

文

館

詞

林

文館詞林卷第四百五十三

碑卅三 百官廿三

中書李寶壽監修國史以文館學士莊國陽郡開國公臣許敬宗等奉敕撰

將軍三

虞南左武侯將軍龐某碑序一首

褚亮左屯衛大將軍周孝範碑銘一首 并序

隨車騎將軍莊元始碑銘一首 并序

隨右驍衛將軍上官政碑銘一首 并序

將軍三

左武侯將軍龐某碑序一首

虞南

昔者彤雲受命樊灌佐其雄圖白水興王耿賈宣其上略並
能刷羽躍鱗培風激水誓丹書以建國錫青社以開基居陳

五鼎出馳千駟盛矣哉功臣之爲貴也眷言前烈疇能踵武
嗣斯風者其唯安化公平公諱某相州鄴縣人也靈源導於
姬水胙土因乎魏邑或脩文仕晉光命服以享大邦或習武
遊梁握兵符而居上將自斯累葉徽猷相踵落下名相伸達
顯其龍章襄川奇偉士元騰其驥足長戟高門軒輊相繼形
諸雕篆可得言焉曾祖某齊中散大夫陳留太守登高能賦
凌雲之氣已適下車布德甘露之祥斯表固已陳諸往牒紀
乎前載祖某齊襄城王西閣祭酒鎮西將軍父某北海郡丞
正議大夫並德業相傳家聲不墜清談篤論芬芳無絕用能
載挺時俊克昌先緒公體膺景緯氣稟英靈容貌都雅風神
秀異資忠履孝彰於髫綺之年武藝雄才見於幟旗之日鸞

弧妙於百中擊劍踰於千里於是氣蓋山東名馳海內思騁
龍媒用申鴻漸豈直梁甫在詠上堵長吟而已哉弱冠爲左
翊衛執戈武帳整笏禁闥便煩左右爪牙攸屬遇炎德無象
雅缺其亡雕騎隨滿月之兵雁門列陰山之陣公頻驅七萃
出自九重右控六鈞左揮雙戟莫不擎旗執戟後殿先鳴勇
冠當時勦高莫府蒙授朝散大夫旣而霧昏九縣塵飛五嶽
戎狄交侵藩維內侮公乃銷聲晦跡言念卷懷語嘿沈浮用
觀時變及欽明在運經綸維始孟津同德之侶沛邑大號之
初莫不抱樂爭趨奉圖歸命公早達興亡夙布誠款乃羸糧
景從憑風撫翼于時天步猶艱王途尙梗偷名竊號蝟起蜂
飛公每羽翼義師率先銳士銜枚束舌夜襲晨趨沈舟焚次

義無旋踵氣奪九軍戰同三捷以平霍邑之功蒙授開府儀
同三司辭舉負阻秦川凶徒甚盛仁果嗣虐同惡實繁爰降
神武襲行天罰公頻率精騎直引軍鋒入地道之九重超石
城之百刃踰艱履險奇績居多特爵冊勲 帝用嘉止蒙授
大將軍以馮異之謙擢加衛青之榮號論功序爵朝章斯允
值馬邑妖氛侵擾疆場龍庭酋長爲之聲援陳狝疆兵尙屯
參合廬芳壯騎或踰高柳乘折肱之氣磬引弓之力元戎致
討遠臨句注公獎率義勇親稟宏謨躬先士卒奮不顧命雄
劔長驅大殲凶醜王充阻兵怙亂竊據伊瀍秣馬河華連雞
趙魏相王宣威闕外杖鉞旗門公以前茅左矩奇兵深入淩
孫瓚之巖城絕王離之甬道元惡剋殄厥功斯茂及取劉闡

於洺州破徐圓於充邑常隨大旆每翼轅門摧堅陷陣所向披靡拔幟楊徽隨機應變殊勲茂績大敗河山蒙授上柱國封眞定縣開國侯五年以久勞戎陣奇功克舉優秩仍加用彰勩效蒙授 秦王府左三翊衛府右車騎將軍七年授

秦王左一副護軍其年又補左內馬軍副總管九年六月以業預艱難效彰忠款蒙授左衛副率其年七月詔授右驍衛將軍其年九月改封安化郡開國公皇上膺圖御歷臨撫萬方永言惟舊恩榮彌重爪牙任切僉議所歸貞觀元年七月詔授左武侯將軍居陪闈錡出僉金輿戒式道之青旂引金吾之緹騎戎麾文物光暉朝野導當比跡韓吳齊功衛霍陪王檢之封翊蘿圖之駕而銜珠表瑞弗永於百年坐樹留

名空傳於千祀弓韜明月之暉劍滅連星之氣精粹所稟何其促歟以今貞觀二年六月某日遘疾薨於雍州長安縣之安仁里宅春秋卅有五 皇帝悼深衽席恩同詔墓贈某官謚某公禮也惟公少稱弘量喜愠不形尤長武略仁而有勇及感會風雲立功成務謙虛下物始終無改雖復關羽有國士之風祭遵懷儒者之操無以加也粵其年十月甲戌朔廿一日甲午窆於雍州長安縣之某原遺孤藐然不勝孺慕同氣友睦彌痛急難爰建豐碑式鐫不朽宣令名之無泯播遺芳於可久乃作銘云

左屯衛大將軍周孝範碑銘一首

并序

褚亮

若夫聖人有作寶歷應期賢傑於是降生叶贊以之同德望

方召而長想超韓白而高步彌成人大之功寅亮邦家之業
騰芳前古垂裕後昆身與朽壤同弊名隨鍛帛俱遠俾無愧
色其唯譙敬公平公諱孝範汝南安成人也姬水降祥惟王
於是建國周原命氏因生以之賜姓積德綿遠歷載悠長公
侯繼及衰紱重映主射雄辯頌美於秦君絳侯質直終安於
劉氏宣光之竭心士位子隱之勵節邊疆自斯已降可得而
言者也曾祖某梁散騎常侍太子左衛率廬沔二州刺史保
城肅侯早標譽望雅有幹局用能杖節擁旄樹功立事祖陳
車騎將軍都督八十二鎮諸軍事定安二州刺史武昌壯公
張幕臨戎褰帷作牧殊勳表於甲令茂賞盛於惇史父某隨
大將軍使持節永桂雲三州總管卅一州諸軍事左武衛將

軍譙僖公舊德非遠汗竹紀於聲芳遺愛所存甘棠表其歌
詠自保城著績武衛安邊宣條千里於此三葉繼踵方牧時
論榮之公惟岳降生含章秀出湛機神而內融肅牆宇以外
峻因心本孝之義發自天資率由立身之道匪因傍習姿貌
瓌傑容止方嚴穆乎苞不測之量毅然有難犯之色兵書軍
志雖不學於孫吳嘉謀遠算自追蹤於衛霍弓矢盡蓋延之
妙騎乘均王濟之工州閭推其敬讓宗戚歎其淳厚美譽所
歸獨高茲日隨大業三年起家齊王典籤其年授交趾郡司
倉書佐趨職藩庭出臨荒裔冀北之步雖涉於康衢圖南之
舉未申於寥廓于時炎精已季亡徵將兆公卷舒其德沈浮
體命殆均亭伯遂遠出於遼陰更似文休亦寓身於外寓及

皇册革運品物咸亨越自邇方歸于京城 主上昔在維城
任隆分陝模燎原於鍾岱止橫流於溟渤遠求時彥用清中
夏公亦推誠霸主委質興王附翼之機因搏風而自遠縱鱗
之致與委水而爭擊武德五年授 秦王府右庫真車騎將
軍君右之舉諒侯勳賢折衝之任乃昇帷幄公之此選實允
得人九年六月改授 太子右內率仍檢校北門諸仗宮率
精兵見稱歷載儲闈禦武尤光顯職奉雞戟以趨侍肅龍樓
而巡警其年授千牛將軍封宜春縣公食邑一千戶地擬封
君榮超戎秩將軍之禮寵賜比於命卿建武之選名號隨於
制敵貞觀元年授右屯衛將軍於立武門領兵宿衛仍以本
職出使北藩宣揚國威曉諭邊俗班奉四條之書肅清萬里

之外使還又領立武門內左右厠仗肅鉤陳於中禁排闥闢
而上征羊祜之握兵機典章之統軍帳任寄之重恩私罕匹
五年轉授左衛將軍襲爵譙郡公加邑二千戶乃司蘭錡奮
有矛戟象賢光於繼及承基盛其土宇六年以本官檢校殿
中監事公累昇顯授所在勤官故能入司武職兼總文吏人
資才幹任華宮省公勵精爲政見稱明察七年 興駕幸于
九成 天駟觀風屯警尤切神居所寄桂栢斯重乃與左僕
射立齡同掌樞禁昔漢后出征馬防留後魏帝巡幸徐宣統
兵方之往賢足稱連類公勵志竭誠言則不隱嘉謀讜議知
而必爲中旨勞問寵賜優洽旣舊抱痾恙遂淹氣序爰加進
疾載迴 天睠於是加授左屯衛大將軍封爵如故方且羽

儀當代獎鑒其脩成大夏之棟梁濟巨川於舟楫而夜臺忽掩朝露已歸未勒寶憲之山遽終畢萬之期七年薨於京師天子爲之輟朝追悼者良久乃贈工部尙書餘並如故有司考行謚曰敬公禮也惟公識量明遠風神爽發蹈德無怠率禮不違潔操乃出於冰霜貞心有踰於金石至於鄉閭之教規範之言石慶愧其餘風王昶慙其家法非典謨之書弗尙非忠信之言弗踐輕劉德之貨財重季布之然諾終如一心涉歷二代口絕臧否行無玷缺加以長於武藝妙識兵機金匱奇正得之於懷抱玉鈐攻取無勞於積習祭遵儒術未足方其雅歌曹仁智勇纔可用其決勝自臨戎御衆莅政當官節約以檢其身寬和以接其下不矯飾以招譽豈乾沒以

徇私在公必聞奉上無隱焚書草而方奏問溫樹而不言趙
武之情留管庫嬰平之祿及朋友而立化旋促芳塵不追投
竿致其掩泣下機所以流恨豈非有始有卒立功立事者哉
卽以其年永窆於萬年縣之某所三河甲士還陳出塞之容
五校饒歌猶奏旋軍之曲岷山之拜彌懷於舊恩原氏之阡
更開於新道公早著款誠夙展勤效沛公初起蕭何舉宗而
有歸晉祚肇基何曾在朝而盡敬故能特昇爵位偏隆寵渥
書社千室享祿萬鍾曲旃雄戟之重文軒綽弩之貴當代近
臣罕出其右薨徂之日朝野興悼恩加工隴禮備哀榮受命
有司立碑隧道昔者西漢殊功唯頌美於充國南宮舊事止
畫像於仲華未有勤茲丹宇旌斯立兆發自 睿衷永胎相

質天古地久與時代而長存石散金銷隨風猷而共遠同夫
庸器之典兼取雕戈之義銘曰

縣縣姬緒奕奕豳風克纂遙胄惟茲懋功家承台衮人出才
雄祖考載德勳庸在躬是爲人譽復紹名公盛業長祀猗歟
積慶誕斯明哲實標英令孝資□感仁由天性潔比清冰皎
同懸鏡藩庭入仕水鄉從政勇冠秦隴聲馳函洛譽美遐外
績宣臺閣運逢霸道時惟聖作乃司禁衛兼謀帷幄寵越等
倫思踰藩岳天爵斯重時榮已隆是惟顯職兼司禁中竭誠
奉上捐私徇公勵行無怠當官匪躬文能附眾武實收功人
擅榮寵族華卿相迺求懿德惟人之望職重中軍名超列將
摧梁奄及偉才長喪油素傳芳丹青表狀逝川不息拱木行

陰猶迴慈棹尙結神襟恩加陳席寵越遺簪追榮總洎策贈
交臨化運長往空嗟德音百身靡贖千載猶生沒貴無朽唯
茲今名銘開古石地上新塋年代滋遠工陵或平卷言芳烈
永樹風聲

隨車騎將軍莊元始碑銘一首

并序

褚亮

昔姬文政典司勳詔於旂常魯史策書大夫稱其功伐洛師
鏤瓦吾之銘尸臣鐫栒邑之頌然則紀迹庸器必候非常之
功騰芳彝篆用資可久之德況乃殞身徇節捐生立事奮於
百代之上裕乎千載之下而無刊勒者哉公諱元始字長節
南郡江陵人也若乃執珪思越非重上卿瘞金入楚賈交窮
巷武疆命社承助顯於西都會計臨人侍從光於東國冠冕

之盛可略而言者焉祖某義陽太守父威湘東內史並泛涉
儒書尤曉兵略威之大父靈福亦守武陵剖符千里於此三
代公降靈秀發資神挺生爰自髫綺已標機悟通家李尹驗
其占對可觀卽座顏回歎其風規獨遠長而異量雄姿角立
傑出苞權豪之遠度蘊將帥之奇材長劍搏擊之機短書從
橫之術彎弧蟬翼之妙登鞍蟻封之巧有一於此公必兼之
仕陳之日歷官藩府起家宜都王國常侍稍轉內兵參軍龐
王師伐陳江表初定公乃奔竄句吳山林屏迹而江湖肇亂
輕慄合從閩越潛謀城邑互起公乃避地餘杭志在宣力值
吳興逆賊攻逼州城梯衝俯臨資援外絕公身在窮圍受屈
強寇士有飢色人無固心而三令已明九距兼設分兵決戰

遂翦妖徒一州獲全寶公之策軍師議賞乃授儀同三司高
智慧作亂吳州同惡相濟艸艸巨水旌旗不絕時越國公爲
行軍元帥交兵浙江雖豹略之機決勝千里而烏集之黨猶
思一戰公受命軍門先驅銳卒運習流而直指攜戈船而長
驚奇兵電激凶徒瓦解逆豎崩潰分竄海隅公又從元帥輕
舟遠襲山谷酋豪應時殲殄水陸阻憑隨方剿定更授上儀
同三司就加開府於是乘傳入朝屯衛宮掖恩踰上等禮出
舊臣吾彥旣晚入之榮黃權乃從公之貴俄授車騎將軍仍
從越國公北伐大俘醜虜振旅而歸尋丁湘東君憂哀毀爲
疾從權奪禮還攝本軍而猶錫未賓侵擾邊服仁壽元年越
國公總戎出塞公任在支軍復隨莫府故以再從驃騎兩出

定襄屬伯初於偏師隱子顏於敵國及大軍轉戰黠虜縱兵
砂礫風飛矢石雨下公潰陳深入輕騎獨先利劍之所奮擊
長戈之所仆斃莫不膏潤野草屍橫亂麻辮髮裘旃扶傷救
死銳氣驕賊臨難忘身殞於虜陣春秋卅有六天子聞之臨
朝不舉乃詔曰車騎將軍元始氣幹標勇襟神果毅情深爲
國志在忘生竭力戎行功立身殞興言壯節有悼於懷宜追
加榮位用申賞典可贈上天大將軍喪事隨由資給仍以本
官開府迴授適子永興有司考行謚曰剛子禮也惟公早叶
英風夙標遠槩資德率禮履信基仁出言爲九鼎之貴恤患
輕千金之產建乎立勳江外位穆台階肅恭奉上廉潔御下
故能竭誠邊幕流勳宸襟使者降斂衮之榮冊書隆加命之

典豈非忘生蹈義臨色盡節者哉以今二年三月六日葬於
涇陽縣之神狐里阡臨京兆地擬德陽五校發饒歌之軍十
里開賜塋之所博陵官屬尙惆悵於王沈謁者護喪實流連
於鄧訓僉以陳君物範且勒潁川之碑張氏孝廉猶書冠軍
之碣況乃勵茲近俗振我淳風節士慕義懦夫成勇言之不
可以已其在斯乎乃刊志清徽樹之神道俾夫披文相質知
皇代之有人焉銘曰

梁楚華胄卿相高門俛拾青綬奕葉朱幡祖考積德踵武洪
源洪源實長有此人良觸年岐嶷綺歲珪璋高風凜凜逸足
昂昂憑封九百披書五行賜璧遊超明珠入梁宗京黍稷舊
祖淪亡獨往攸貴自得爲揚吳越輕心寇賊交侵連衡浙右

阻亂稽陰我有奇策偏軍互臨良圖外斷英勇內沈轉鬪千
里觀機七擒台儀已峻帝寵尤深磨下騎士兵屯羽林耀烽
夕照絕幕從戎登蛟氣憤躍馬心雄腰橫楚劍項縱秦弓酣
戰力屈長驅路窮傷情邊塞結悼神躬策命追遠絲言飾終
哀榮禮備贈賻恩隆蟻結將掩龜謀已同旌旒照日饒鐸含
風誰言不死貴在銘功

隨右驍衛將軍上官政碑銘一首

并序

褚亮

若夫楚都爲寶兼瓊於是不貴梁園攸珍明珠以之非重賢
臣者爲政之樞機佐時之棟榦鷙鳥累百無申搏擊之功良
馬日千乃見康衢之力至於勳書紀狀業著司庸存公立事
之臣沒稱遺愛之美則上官使君其有焉公諱政字匡濟京

北某縣人也其先惟德受氏因官賜姓青史派其長源丹契
傳其遠葉子蘭楚國之大夫桑樂漢家之令望自此蘭芬桂
馥玉潤金英軒冕相繼賢才爲伍九代卿族旣已慙華七葉
珥貂信其殊寵王父某魏使持節大行臺原州刺史布教文
昌之宮儀形列岳之選功宣彝鼎道冠冠生靈父某周使持節
大將軍某州刺史象賢以德受爵惟仁盛業存汗竹之書餘
風表甘棠之惠公夙承基緒早播聲芳協膺運之雄姿爰誕
靈而秀出皎皎奇節昂昂異□雅性與江海同深英風隨寥
廓共遠孝友之行道高於搢紳退讓之心譽結於鄉黨技殫
劍史學兼韜策孫子短長之術魏君接要之書巧射匹於陽
元善騎同於武子縱情儒業遊藝翰林蹈道必於仁厚結交

崇其信義弱冠登朝脩名獨遠天和元年召爲右侍上士其
年月改授折衝上士于時王業肇基霸圖將構妙求賢傑元
屬勳庸公勛勞草昧竭盡心力依日月之末光瞻攀附而長
想大象二年奉別敕依儀同例是曰勳舊乃披荆棘獨升朝
伍彌簡帝心及革命從時應期啟運宋昌特拜既可爲儔何
曾盡禮尤其相匹開皇元年乃授儀同大將軍賜爵安養縣
子茅土之恩爵頒五等蒲璧之美榮高一代五年授左武侯
車騎將軍八年以本官兼長春宮總監式道之官實須禦侮
離宮所幸必資供辦十六年授左備身府驃騎將軍十九年
改領右親衛府驃騎將軍惟左惟右兵欄於是得才或內或
外鉤陳以之載肅仁壽元年獯粥孔熾控弦犯塞烽火通邊

薄伐之選非公勿可於是奉詔徂征鞠旅深入結武剛而爲陣運衽席以致兵出其不意忽然相接將士用命思蹈湯火斬獲不窮遂殲巢穴十一年進授上大將軍改封義清縣開國公食邑一千五百戶加地進律策勳命賞戶口盛其租入光寵備於朝章三年授左備身將軍四年以本官檢校慈州刺史事于時晉陽構亂妖氣未靜漳滏之寄心膂攸歸公式遏寇虐廓清遐邇關河克定趙魏無塵於是黠吏畏威小人懷惠冀杜之化諒在茲辰賈邵之風固其慙德大業二年授潘州道行軍總管憬彼海隅不遵王略公執鉞偏師宣威外間除其氣沴遐方靜謐三年徵授左武衛將軍頃之又授右驍衛將軍升降彤闈驅馳紫複聲稱斯遠朝野穆然其年普

班新令官號初改於是更授右光祿大夫將軍如故及爨駕
西幸怨其南征轍迹所臻方任尤忤於是又以本官檢校西
平太守疆場偏隅寇戎接境公導之以德齊之以刑夷狄相
趨纏絡而至釋冤理訟無勞於鉤距以寬濟猛不行於皎察
得經邦之妙旨識美化之有由可謂其綏兼稱能吏求之古
人差無愧色循良之化載暴於天朝脩短之期奄捐於人事
上玄輔善旣已無徵勾芒賜壽豈爲誠說某年某月遭疾薨
於官春秋五十有五天子輟朝不舉追思將帥之臣萌庶罷
市相悲同興環珞之恨有司考行諡曰某侯禮也惟公早契
宏圖夙標令問天經地義得之於自然蹈德依仁匪由於傍
習廉潔不私精慎無怠莫窺喜愠罕測堤封履行斯和所交

必信見惡如由已聞善若順流寬裕足以容眾矜莊可以勵物既在貴而能降實居榮而好謙爰初弱歲洞曉兵略攻取戰勝之機隳城陷敵之勇每至營圖卻月氣折寒膠矢石如飛旗鼓相望公則雅歌臨陣搗扇從戎威稜獨遠隱如敵國加以終始一心驅馳兩代亟經征討屢典軍人去必見思居常稱職故能服冕乘軒獨榮當代擁旄杖節垂譽後昆豈非斯人之秀士有國之良翰而道長運短零落無時一喪名賢同悲殄悴卽以今十一年還葬於京兆郡某縣之某原古者王臣之勲必書方策貽厥之義式銘鍾鼎前志有之足以明鏡言之不可以已其在斯乎嗣子某等在家惟孝登朝必聞上弘思親之道傍求紀德之事於是刊石宣風永貽相質頌

曰

辰昂降精人物之英門多才秀族有公卿永錫流祉繼迹揚
聲遞驅華轂互委長纓迨茲令胤奇姿挺生盛德祀長屬在
人良黃中岐嶷青領珪璋如彼鳴鳳曜彩朝陽如彼振鷺矯
翼高翔闔室無怠幽宮獨芳心齊竹柏操擬冰霜從橫劍杪
遊息文場功參霸業策定勤王董司軍要展力遐方式陪蘭
錡著績衡漳勲存賞冊勇冠戎行申威朔野剋定邊荒時逢
交泰運屬重光巡警載肅劬勞以彰出典專城方隅廓清屢
摧封豕亟翦長鯨一年請倡期月斯成銀黃盛寵金爵餘榮
悠悠長運促促浮生匣龍埋沒送雁哀驚陽陵卜兆洛涘占
瑩藏舟不固深谷終平死而可作惟茲今名

校書殿寫弘仁十四年歲
次癸卯二月爲泠然院書

文館詞林卷第四百五十七

碑卅七

百官廿七

中書令李寶嘉修國史文館主上柱國高陽郡開國公臣許敬宗等奉勅撰

都督一

東晉孫綽江州都督庾冰碑銘一首

并序

東晉張望江州都督庾翼碑銘一首

并序

東晉伏滔徐州都督王坦之碑銘一首

并序

梁孝元帝郢州都督蕭子昭碑銘一首

并序

北齊魏收兗州都督胡延碑銘一首

并序

都督一

江州都督庾冰碑銘一首

并序

東晉孫綽

君諱冰字季堅潁川鄆陵人也氏胄之由累葉之載固已被
於竹素播其名跡矣君則左將軍之子太尉文康公之季弟
也喻嵩巖之立精挹清潁之絜流貞質侔於白珪明操厲於
南金少有令規元兄器之常以爲庾氏之寶有晏平之風司
徒辟不就博士徵秘書丞封西陽縣都鄉侯司徒右長史吳
王以母弟之貴肇建東藩守相之任實杖親賢乃授吳郡內
史望境而清風興踰時而仁澤洽蘇峻之亂京都傾覆君乃
東奔會稽遂與諸郡同舉義兵于時豺狼縱毒寇黨焱熾正
旗雖抗衆心猶懼擁徒保險疑於勍敵君厲色攘袵請爲前
列驅烏合提偏師徑據舊都推鋒西進抗封豕之衝振熊羆
之氣東夏克濟君有力焉又遣司馬滕含先登石頭擁衛乘

興奉迎鸞蓋忠勳之至實簡帝心進封新吳縣開國公推而弗當除給事黃門侍郎退而弗居出撫會稽加振威將軍尋增號征虜君明允貞固達於從政化行二邦式範千里雖勃海之歌龔遂潁川之詠黃霸蔑足方之徵領軍不就朝議以君器充廊廟幹周時務可以彌綸政道參贊皇極遂徵還臺俄而加左將軍楊州刺史中書監仍除使持節都督揚豫兗三州諸軍事雖名器未極而任盡臣道正身提衡銓括百揆知無不爲謀必鮮過端委待旦則有心宣孟約已訓儉則擬議季文夫吐剛茹柔執政之所易撓矜已尙人乘盛之所難遣君平坦無私勞謙寡欲當時之所難於君而易之矣於是慨然遠覽量已知退高揖帷幙投跡藩屏杖節都督江荆益

梁交廣寧七州諸軍事車騎將軍于時南夏多故賦役殷興
萬里蕭條人亦勞止君乃休之以無事綏之以惠和政有亨
鮮之詠人懷寧一之歌沛若洪流之引枯鱗滄若時雨之霑
塵柯建元二年康帝崩徂光庶喪氣朝野莫憑太后遣大使
徵君輔政以底人志將寄周霍之重當阿衡之任君固執遠
圖確然不迴冬十有一月九日薨于位臨終存國思不出位
遺制恭謹廢情尙義夫良玉以經焚不渝故其貞可貴竹柏
以蒙霜保榮故見殊列灌正而不亂者有矣未有亂而彌正
者也考終以證始卽事以徵心少長能一其度貴賤不二其
道文康文雅曰於是乎弘著矣皇朝震悼有識掩涕誠以良
臣旣喪國有殄悴之虞棟折榱傾人懷壓焉之懼致感之由

豈虛臻哉追贈司空諡曰忠成禮也故吏王某等哀袞龍之
虛襲慨皇維之不綱援甘棠以興慕思自同於三良乃攻石
樹碑以永刊洪烈其辭曰

洋洋浚潁巖巖神嵩流滌漳氣嶺扇祥風篤生公侯情虛德
充臨川擬潔仰華思崇淩險斯夷處滿能冲方恢遠猷皇極
是贊進陶玄氣退康時難繁霜夏被修梧摧榦仁之云徂朝
野銜歎如或可贖人百其算儀形永戢光風長煥

江州都督庾翼碑銘一首

并序

東晉張望

君諱翼潁川陽陵人也其先帝鴻之苗周大夫庾皮之裔高
祖徵君抗清雲之皓志考左將軍執懿德以熙緒遐胃啓于
玄聖洪慶休乎百代是以徽風載芳清塵繼軌逮君兄弟冠

冕江左文康弘具瞻於前忠成光人譽於後林蔚嶺秀之標
川澄海納之度固已式準羣英而煥乎當時矣君吸乾剛之
純氣誕命時之偉姿清粹聞於志學英風暢於立德孝友通
乎神明安懷著於耆齒字量淹通識具融達明鑒燭微而不
矜昭晰之容高朗弘豁而不浪放逸之迹道味玄詠則擯筌
乎象繫之津墳研典析則慎徽於五教之域器掩物軌度貫
眾藝儀領裁然若衡岱之標秀嶠神氣充暎皆清霞之爛朝
陽蔚蔚焉昂昂焉實期運之挺根而縉紳之領袖也始辟太
尉掾參軍從事中郎翻翻芳澤鳳集台林雅杖希夷緝和鼎
味洋洋然其猶波瀾之煥長津也時預謀克捷酬庸珥爵封
都亭侯除鄱陽太守舉納遺事政存亨鮮尋遇元兄太尉推

轂陝右董衡有存而榮非所甘於是懷親忘祿巾褐而歸龍
盤家巷放心嘯詠西伯之受恭行也望境而興懷焉尋建修
邾城以庇人祐土以君爲建武將軍西陽太守董率三軍披
榛立政未及暮月而惠納著矣于時沔漢不靖庸蜀內亂江
陵居二寇之衝握進禦之會伐罪固藩望鍾雋哲於是銓衡
羣寮精簡高美以君懿親之秀遂應郗子之選遷使持節領
護南蠻校尉建武將軍南郡太守尋轉輔國將軍播德荆川
陶仁舊郢踐境而敦喪葬下車而明黜陟權略形勝之幾整
鋒運武之要承規英伯屬當奮伐甫將抗旌西指先滌江源
而遇太尉傾徂朝野震懼闔外之重匪賢莫倚乃授君使持
節都督江荆益三州諸軍事安西將軍荊州刺史徵還武昌

以鎮寧內外尋加江荆益梁雍司六州都督君常以地接辰
極乾惕盛滿雖諸昆守之以道而冲戒之誠彌至每在出處
之際未嘗不雅思進止而先盡謙損之德也屯務所纓於斯
雲萃故專征興復之勤遂讓夷而當之矣于時初喪元輔畿
宇殄瘁羯虜承間狼逸郊境烽燧屢舉人無寧止君雖提衡
嗣畫一之烈紐綱振惟新之緒申教官能綏撫邦域罷遊塵
抑淫祀閱戎政明市獄開誠心以布公誼讜言於輿黷勤勞
謙於味旦始儀刑於閭城擢廢駿於沈滄考名實於底績通
聘燕涼則二邦協連師之盟鷹揚六境則疆陲弭遺縱之謀
蒐練示整則五城縮安陸之戎奇師西探則四壁退江陽之
醜遐邇寧肅而凶黨震憤頻加江豫州刺史君以爲設位存

乎樹賢竝所以周務寵靈兼荷弗之當也先夫固本正末
大宣皇風濃化美俗崇善濟人申懲勸戒流泮枉直惠加荒
札仁興弔祭禮信弘敷而邦域鈎漢廣之詠愛人平賦則圳
野存史克之歌德刑成矣下知方矣君以神州之難大恥所
存否終之會運存函夏昏阨非盛衰之虞動戎勞射隼之銳
故緩嶠山之圖而先河洛之舉於是乃厲義聲激羣庶樹爪
牙連方鎮訓卒補乘闡境爰發省煩役以紓人承逋萃以充
務農不廢職而軍實以殷班號終朝而區內響應飛雲蓋汚
連於千里辭二伯雅統之逸尋方叔急病之勤肅若長風之
赴素節沛若江漢之迴迅源也遂進鎮襄陽以逼臨宛許旣
乃杖皇威以北盼據電發之機領長轡風灑則萬里應控義

聲雲翔而遐外宅心明大順之師絕錐刀之捷峻方城於千尋溝湯池於九仞淫粟屬於漠濱嘉南蔽於千畝杜津汭之奸制商夷之禁緩舊人之業重侵掠之刑立典客以禮賓節苞鮮以簡役瘁醪素投故熊羆爭奮冬景柔暉而華戎響悅雖諸葛渭南之師亞夫細柳之整方之蔑如也於是革音回面之渠繮負企踵之隸其猶鍛礪之歸鄧林涸鱗之望海澤也轉持節都督荆梁雍三州諸軍事刺史如故尋加都督荆梁雍司冀五州諸軍事征西將軍夫制寇存乎控引故俯僂恭兼督之命名爵繫乎定勦故冲懷讓加崇之榮赫赫乎投袂之偶誠勤王之遠略運之以戎昭斷之以果毅雖龍泉未灑而寇寤梟期雲畢四罩而鴟鶚待裂矣建元二年康帝晏

駕俄而季兄司空薨逝陽九垂消而釁糾累集顧睇嵩華撫
劍風慨釋狼弧殆發之機謀尙父旋軫之會皇基之攸憑實
伯舅是賴故且反旆江湄以鎮靖萬里乃授都督江荆司冀
雍梁益七州諸軍事征西將軍領護南蠻校尉刺史如故雖
則鸞衡暫憩而宏綱振乎四維握勝俟時而英籌懸於朱幘
也是以明發訓咨思融政道總括奇儔啓樹風聲引彰表儀
導宣禮則名教光被仁風四暢方將運神羅連絕蹤揮櫓槍
以電掃豁百六之氣濛明金精以熙玉燭贊璇機以一萬邦
豈徒擬烈召陵方休踐土而已哉然後齊蹈川巖投徽遐想
功遂迹喪淩風獨往景命不永春秋卅有一永和元年七月
薨于位天子震悼羣后含慟岱傾仁委何痛如之追贈車騎

將軍諡曰肅侯禮也惟君雅詠蓬宇則棲心沖寄解褐應務則偉績允熙運軌否剝之極總轡經綸之時疆理糾紛吐握日昃雖業連三辰而布衣之心夷地兼危溢而虛挹之體隆聲靈乎彝倫之領味盛德之弘風君實光振之矣仰咨前哲俯憚時難每喟然永懷何嘗不籠維胸臆標至公爲己任焉夫昆彭之能究其勳姜邵之能遂其道者或運階陽升或靈輟修祉惜哉旻天不弔儔轍與屯塗並消宏規與促齡俱逝朝殞基棟之輔野喪弘化之豪泉涸林拔鱗羽曷歸凡在有識建我臣故追述七德永歌九功目想軌儀心存洪略痛神景之長淪悲衮龍之虛設思鈞甘棠哀同黃鳥撫膺陶慕靡所寄心乃相與鐫石紀德以蒸揚徽烈其辭曰

玄象因曜龍房澄景靈煥荆河氣瘴嵩嶺峩峩君侯含章
挺玉振流津金昭暉頽擬量浚川儀仁崇嶺肇自鳳棲惠
播芳扇翮扶搖舒映朝陽懷之休邁如彼翬翔遂撫衡漢
抗我宏綱疊疊遠猷赫赫規宇制陝峽略時惟雋輔四鄰
引領絕維翹武將廓乾羅滌夷昏阻隆替靡期因應有會
志朗器氣天衢俟泰望舒滅圖慶雲消藹辰極掩暉蒼生
喪賴哀貴皇穹悲延遐外仁基雖淪英風永葢

徐州都督王坦之碑銘一首

并序

東晉伏滔

君諱坦之字文度太原晉陽人也遠源氏族之始帝王則天
之盛國史載之詳矣聽鳴鳳於伊洛知隱淪之美觀玉帛於
西山仰止園之德爰自高曾逮乎烈祖東海名德遠流繼軌

二代考驃騎令公清貞簡正名重一時高鎮風流憲清百辟
君承積善之純祐鍾四葉之休慶膺昭粹以載德資大和以
陶量淳基默殖邃度溫潤枕藉道業不峻崇尙之軌含明內
映不以前識先物夫其孝友之性天誠特受道心玄默領識
淹深悟懷所屬必卽象以存其致理思幽研必自疏以究其
源加之以和中善誘觸類資通弘長之潤彰於虛受之韻存
當之心坦於廢已之誠故能周應羣方而不渝其真泯然莫
逆而貴賤有位望形者仰聽而日親希風者覩契而彌敬由
是聲重弱冠風流推美鳴鶴在陰道契哲王辟撫軍大將軍
掾則簡文皇帝也自相府叅軍至于大司馬長史歷官有六
累職顯要固辭弗居誠約納於明后屢讓光于朝野頃之遭

簡侯憂喪過乎毀殆不勝哀君子以曾閔之性不是過也服終襲爵藍田侯拜侍中領左衛將軍太和之末天地革正咸安之際哲后云徂君以時望管要綢繆主相之間熙贊盛明王猷允塞將翼幼冲陟降無違山甫之勤至焉王臣之心盡矣轉中書令領丹楊尹尋遷使持節三州都督北中郎將徐兗二州刺史于時太宗登遐元輔仍徂浹辰之間天岳傾落朝野失圖四海喪氣可以保固皇根常代謝之寄者數賢而已夫有餘於安則君子圖其高枕亂者求理賢哲以之馳驚君自澡身歷位山內從容中道雅杖風體功務之事未之厝心艱運來屬經綸在我援手之興與事而至矣夫內康存乎外寧強幹所以隆本北藩密邇任重陝東用輟心膂之要以

應方邵之舉君乃投使夙鴛卽鎮淮徐其爲政也推至公布誠
心明甄勸振義風獎引羣才虛矜日昃約法崇信練真蕩僞
善之所存臺隸盡其心化之所被幽荒引其領惠旣沾而物
懷令未周而無犯故淮岱之人靡然向風鄰境仰流邊虜思
順忠武之在渭南鉅平之鎮襄沔方之德政異代同規矣惜
乎公始基靈算方申遠猷屈於促年仁功運而未融春秋
卅有六薨于位觀夫識契之土闔境之心莫不撫襟內悼咨
嗟累歎豈唯存亡致感人理之慟哉實懼兼梁木而愛百於
甘棠也惟君總角標秀體備德成素履謙約在隆思復純誠
默至不異心於顙昧正情遠概不染慮於風波少而覃思易
老停神幽贊婉想深興悠然遠對柔詠一室理暢懷抱暨暨

點信有以玩天下之蹟而樂得其志矣既乃感運龍躍仁爲
己任憲章大業緯範人倫覽三遊之傷化故軌之以王度感
放蕩之忘本故檢之以格言臨危安命在終彌亮貽德音於
二相垂明鑒於千載允可謂擬心伊邵造次必於是者已故
吏姓某等陶漸日化伏膺訓範感一遇之莫尋悲道融而功
廢乃相與鐫石紀行以存厥實其辭曰

神理停照妙氣虛融哲人乘和映秀黃中根由貞遼德以深
冲量苞潭致宇蘊仁風翼翼素業陶我遠猷泯泯淹識會深
應周枕藉儒道深緯六流標形耆器卽心則柔昭德無迴運
有夷屯皇上委誠百姓歸仁慨焉忘己乃經乃綸舒翼一援
大庇斯人望古遐憲王業攸遵道之不融闔風其墜員景方

昭中天絕轡人亡孰嗣歷焉誰庇敢勒遺範式存髣髴

鄧州都督蕭子昭碑銘一首

并序

梁孝元帝

蓋聞克明俊德元愷之臣具焉思皇多士毛畢之佐存焉由
此論之昔者明王靡不咸樹賢戚俾立宗子建五長以御都
鄙作六瑞而典邦國其爲日也久矣皇梁革命欽若前經於
是制詔御史推恩分邑吳平忠侯蕭公茂親明德勲功事勞
故以書太常之旌藏司勲之貳惟寧之美於是裕哉公諱某
字子昭蘭陵蘭陵人自玄鳥作猗邠之頌白馬致蓂莢之歌
克黜禍難然後保姓守氏締構漢主然後涉魏而東胤聖挺
賢英豪繼踵祖左光祿府君體王季之德考東陽太守躬號
叔之仁國有倬史詳諸譜繫公惟嶽降神才爲時出寶川興

氣翰彼于宣載色載咲異體明之言善一孝一友非陽子之
貌濟道德功事兼該兩陸保家經國總括二韋息藝以依仁
澡身而浴德解巾調補齊晉安國常侍踵武龔舍連步叔寧
雖未鵬飛且資鴻漸出試永寧令岑鼎方泊牛刀始割日撫
鳴琴不以河陽爲陋時摘雅賦更覺齊都爲鄙永嘉人胡仲
宣等千人詣闕請公爲郡將欲許焉齊氏以長沙宣武王勲
用公爲步兵校尉公覩黍離之際木運不長故遠魏朝不論
人物時遵漢典或校兵書旣而夏癸昏縱商辛廢禮社稷鎮
衛用明允而嬰戮時宗人譽由正直而亡身自宣武王邁此
淫濫公與時用舍知命樂天達平仲徐行之音慕宣尼絃歌
之德仰逢六師西指五緯東攢火燭前殿兵臨作室公乃製

衣具沐將濟屯膏遠自郊門奉望鉦鉞賓客樂從者數十百
人中興元年霸府拔補寧朔將軍行南兖州事遷輔國將軍
監南兖州昔馬越之領游擊馬恬之典吳郡卽此麾號皆用
宗戚傳呼甚寵識者榮之加以密邇北門寄深關櫟殷人未
狎四郊多壘藪澤遐曠逋竄所逃陳午擁眾於鄒山庾希綱
發於海縣旣外鄰戎境內患萑苻自獨夫奔常憑暴歲甚師
之所處加以薦饑公閑於殿亂善於因卽政不悞弱濟維寬
猛撫循煢幼鋤翦豪强州無滯積公無禁利莅官行法善政
斯在惟皇建國品物咸亨舉功行賞各有分地封人設壇典
命授圭封吳平縣開國侯食邑一千戶進授使持節督南北
兖青冀四州諸軍事冠軍將軍南兖州刺史旣同宋義之號

且等去病之功爰初徇地迄此作牧人無茱茹之勞官無芻
秣之費先是王師北討戎帥捐戈天子命我受脤建節有詔
翼行犀櫓不蔽武車綏旌九地靡韜其術轅門誓眾八陣咸
盡其謀故以威讐隕霜化行絕漠者矣遭太夫人薨僉曰金
革奪禮有爲爲之且遵故實別詔敦勉公稱情立文以奉權
制每一感慟飛走相趨時宮衛俟賢朝難其授諒須才冠遙
集識兼謀遠乃徵公爲太子左衛率遷輔國將軍衛尉卿昔
漢調銚期止資放數之力魏選董昭纔求巡警之備公之此
舉允膺掌笈何止不疑之清正玄成之文雅同日而語哉轉
左驍騎將軍兼領軍將軍自延康改革任均盡護直以御史
之印不易趙堯先零之舉無踰充國故超茲河沛越此英盧

燒是常均攝官而進今之樊漢昔之關輔蓋惟軫壺之野仍
爲輿質之邦楚襄好會之所劉牧郊天之地雖非甘泉密時
實有伏龍鳳鵠王業所起家出將相漢臯之陽八命爲重推
轂之寄九牧所先乃授公使持節督雍梁南北秦四州郢州
之竟陵司州之隋郡諸軍事信武將軍寧蠻校尉雍州刺史
褰帷就道去襜爲政廣聽遠視薦清貶濁惟來百蠻悉爲我
用秦土不敢彎弓胡人不敢南牧駟介徒兵日充王府師出
以律遠無不懷徵右衛將軍石頭戍軍事又授使持節督南
北兖北徐青冀五州諸軍事信武將軍南兖州刺史昔郗鑒
再撫朱序重臨未有懸牀尙存遺櫜猶在俗稟王濟之風人
懷叔英之政厥德興謠還聞在昔徵爲領軍將軍加侍中昔

卞壺之加常侍王劭之領納言雖並作中候彼有慚色遷安
右將軍監揚州并置佐吏卽以第爲府于斯時也修學創田
勉耕分祿不然官燭罔蓄私絹朝野具瞻權寄日重公常思
捐挹以避近親上優遊未許靳守彌固乃出爲使持節散騎
常侍都督郢司霍三州諸軍事安西將軍郢州刺史給鼓吹
一部初齊安竟陵犬牙虜界縛馬詛軍亟有竊發公移書告
示虜卽焚戍保境風教如神萬里清謐方當永贊隆平粵登
三事天鴈不戒春秋卅七普通四年薨于位詔贈侍中中撫
軍將軍儀同三司侯如故喪反舊塋路由皇邑親降轎蹕禮
優詔葬某年葬于某郡縣之某山謚曰忠侯禮也公奉親不
匱匹曾柴之德昆季天倫深姜繆之愛資忠履信席義枕仁

從諫若轉圜用賢如猶已佩觿之日則伏誦千周垂髦在年
則懷書百遍風鑒散朗吐屬淹華宮牆百仞莫窺其宇喜愠
無形誰見其色遺養時晦招攜以禮亟撫邊人廣董戎政玉
門之闕仰其威治金附之國挹其風猷每銜詔中都叅聞三
宥朝有常刑每用中典人惟國本上能紂職麗邦法而有平
反坐嘉石而無賢怨知人善使自家刑國筆硯皆有方略履
履並得其才詭對造膝訐謏嘉告函訪密奏手書毀草是以
明主敬焉公既博聞強記雅好詞屬坐朝餘暇臨聽末景壯
風塵之客延好事之賓成誦在心發言可詠名馳合浦以南
譽滿交河之北非夫純粹鍾美利物長仁孰能功叅五臣行
兼九德若此之盛者哉詩不云乎樂只君子邦家之基其忠

侯之謂矣故吏某等以爲封墓作謚衛鼎晉鍾皆古典也仰緣皇朝褒終之美謹遵披文相質之義可以奮乎百代永旌不朽乃爲銘曰

顯允君子惟梁之睦綴食帝宗承家皇叔乃文乃武乃明乃淑冠代羽儀如鴻在陸孝盡色難豈伊爲養亦有兄弟咸宗退讓州閭曰仁友朋稱諒聿求禮本言歸德尙用賦王門鳴弦下邑憬彼桐鄉令圖已立否之匪人時屯勢急斜徑不行亂邦豈入受師億萬商旅如林六奇王略十亂一心創制爰始天命斯謐奄有千室邦家是臨齊俗黍離餘風未更濟濕喉襟忠侯爲政朱軒駟馬旗旄增映恤獄問冤人冒繫詠徐戎叛援自昔不虔授我齊斧清我朔邊躡林蹶角遂掃穹壺

人無怨謫師以勝旋乃司三秩遂掌八屯元戎式總擢授便
煩外數軍實內肅帝閭宗臣在位王室是尊秦中顯敞聞諸
載籍雖假楚都事華前跡班宣條詔光今邁昔必則令典爲
教所擇淮海惟楊是稱司隸苟矣中撫其儀逮逮威而不猛
寬而有制三獨歸高十邦感惠蘇秦從說實曰夏州巖城郢
□作樞中游乃睠西顧惟賢是求去茲商洛樹彼徽猷降年
何早曾不憖留皇情軫悼萌庶若抽輟春罷市痛我忠侯人
道不遐令名長久矧伊樹德歸全啓手於穆嗣侯遺新克負
弈業載德隆茲不朽神靈旣已日月有時桓桓寵贈班禮台
司我□文物哀以送之誰旌不朽□□□斷

兖州都督胡延碑銘一首

并具

北齊魏收

若夫叅天兩地之尊承運據圖之貴降日貫月之禎流星照
電之感莫不叶道冥神應靈貽祚誕由內主之訓克隆外戚
之重是故娥莘配德聿興往載任姒作合實□前王魏肅宗
明皇帝出自於我仍業丕顯餘福潛被大齊之家有萬邦皇
風之披攘九土增茂範於重光振徽猷於昌歷武成皇帝造
舟降禮忻合當成顧塗山而告徵遊洛上而投契家業崇於
削山門德深於委水王諱延字△安定臨涇人司空文貞公
之曾孫相國文宣公之孫中書監公之子今上之外祖父也
自卦呈觀否之體兆著嬀姜之業蘊嘉氣之精累神物之證
非直山靈水伯降德流祉雲感木變効貺開符達人賦命上
善咸極君子克生中和必總雖性不可閤而心隨物化符彩

秀麗溫如和玉精華映徹爛若景雲一見眸子慙仰骨法嗟
王郎之絕倫許劉君之遠到遇師則學衆賢歸道來扣必應
羣俊鑽堅加以律度清上風範玄曠在高而靡礙居深而不
阻對揚古今網羅術藝極能事而矯然窮多方以獨立名賢
奇士先後同歸俗仰萱蘇時傾金璧魏司空任城王聲高望
遠雅俗朝宗王屈迹觀人振衣投刺倒屣降階果異常等辟
書仍降爲叅軍事勅除尙書右主客郎中歷轉二千石右士
二局含握香蘭趣伏墀屏覆衾題柱異目咸推仍除司空司
馬加威遠將軍行河內郡入調金鉉出執竹符水土載穆風
雨必致旣而茵鼎空設棖楠云感慕動羣物祭出非時或紀
鼎半旬或去鹽歷載恩錫摩絮之衣詔喻強食之禮起授尙

書吏部郎中固辭數四終於奪情權衡在手揚清激濁人地
畢進草萊咸舉入轉給事黃門侍郎遷散騎常侍領秦州大
中正敷奏歸高談議推重刀尺所加其仰清裁拜七兵尚書
徙中書令龍泉已斷鳳沼增清轉侍中加撫軍將軍光祿大
夫金章紫綬復拜中書令溫綈臨首鳴玉垂腰含章待問格
言獨遠加驃騎大將軍左光祿大夫仍除吏部尚書持節北
道行臺二千石已下便宜黜陟風馳萬里氣振百城廉平忻
其布帛貪殘解其印綬復領秦涇二州大中正出除使持節
都督兗州諸軍事驃騎大將軍兗州刺史更滿還朝復行梁
州事奇政異迹遺愛作歌殫所未聞方傳故老以某年薨於
位春秋若干詔贈使持節都督涇州諸軍事大將軍涇州刺

史太府卿太常考行謚曰惠公以某年安厝於公所惟王神
府洞開靈鑒懸燭會百慮於常寂總萬籟於希聲形質有崖
忘懷得喪機神不測與時用捨本立道生自家開國學優而
仕振野光朝比高雲漢爲羽儀於日下並峻山岳作瞻望於
海內無惑奪魯龜之智不言析楚客之辯理家抑轟轟之氣
立已遺赫赫之名傾賢解駮趣士迎閭居後而更先持退而
逾顯勢如烈火可等華井之寒富同金穴能比太舟之散故
使鴻休景福終然允臧禮邈齊紀榮超陰寶永惟盛德之隆
申以不常之典更增假黃鉞使持節都督定冀并瀛青趙滄
齊涇濟梁兗十二州諸軍事驃騎大將軍定州刺史左丞相
太宰司徒公錄尙書事開府儀同三司永昌郡開國公安定

郡王爵尊域內望崇天下未極棟宇之右方與陵谷同化所以衣冠長感迫仰芳塵故吏姓名等慕深拜泣式鏘琬琰敢作銘曰

自媯作陳徙齊於秦河靈岳祐風聲日新無競惟祿在賢稱人羽伯歸鳳毛長宗麟代有盛德門應介祉帝娶西陵王迎渭涘我聞天眷休命致止道邈外親風高戚里官由德舉榮極人龍珪璧爲瑞車服以庸門交節鉞室列歌鍾匪先伊後更曰臣宗逮我嗣業實弘休緒金聲玉閭霞霽飄舉搏風抑揚承日容與富輕齊魏賁薄梁楚克弼朝猷亦辰王度萬機增損六條宣布素几云錫畫襄載露秦川逾仰荆市先慕光景不息日往時來殊禮加數哀人告哀光前絕後邈矣悠哉

家賢崇構言歸八才朱表高臨青松上刺峴山不殞樓氣方
積式染

刊堅石茫茫萬古誰今誰昔

文館詞林卷第四百五十七

文館詞林卷第四百五十九

碑卅九 百官廿九

申鑒令李賓客監修國史弘文館學士桂國陽都開國公臣許敬憲等奉 敕撰

都督三

隋李德林秦州都督陸杳碑銘一首

并序

李百藥洛州都督竇軌碑銘一首

并序

荆州都督劉瞻碑銘一首

并序

夔州都督黃君漢碑銘一首

并序

都督

秦州都督陸賁碑銘一首

并序

隋李德林

公諱杳字雲邁清都臨漳人也有魏及茲門爲將相軒冕超於六葉事業光於九有曾祖某司空公東郡莊王美鼎餽之

和垂台象之耀祖冀州刺史東郡惠公清猷雅望冠帶推重
父開府儀同三司東郡文宣公樹德行道摛紳注意公往家
河洛含章挺生水德不綱諸華漸亂臣有轉日主或寄坐家
家習從橫之說人人懷戰爭之圖公執操不羣早而秀異依
道遊藝俎豆而已然其屈迹和光卷舒不測異類喜其汎愛
同道貴其深誠故雅俗傾心聲高天邑魏司空咸陽王坦公
之舅也釋褐參其軍每步槐庭如映珠玉元象年中除都督
府主簿加明威之號轉淩江將軍大將軍中兵參軍所奉之
主卽文襄皇帝此則周武爲太子之朝魏文居卽將之府正
己膺正人之選文藝從文客之遊武定五年轉太常丞六年
授尙書左中兵郎仍歷度支金部庫部天保初轉倉部文宣

公薨公孝行昭著特改所居爲孝終里起兼行臺右丞巡江
慰勞時則侯景外叛殲蕩金陵自江已北始爲國有陳霸先
鳩集大羊窺我王略公運籌於外往若風行地方數千一舉
而服七年以太夫人憂去職給假十旬起爲度支郎又轉都
兵舍香粉壁年將一紀雖復器用見留時論咸以爲屈公怡
然自得未以升降爲懷遷成安令帝城之下舊號難綏齊導
有方大弘聲績尋授肅宗大丞相府從事中郎仍兼并省右
丞晉水之陽一相攸在霸者之佐知無不爲皇建初拜給事
黃門侍郎冠軍將軍大寧二年除散騎常侍夕郎顯任垂憲
官人出納如流見稱臺省北夷猾夏往寇太原王師驅逐已
出塞表防遏之理朝議猶切公前後受詔北築諸城東西接

連亘二千里城池作固沙漠無虞詔食永寧縣幹加輔國將軍賞勤幹也天統元年除銀青光祿大夫領兼太常少卿大樂大禮多所刊革救監庫部營造軍器智均武庫職重軍謀事無不有才允斯任加驃騎大將軍假儀同三司五年出爲使持節都督東徐州刺史武平三年轉使持節都督北徐州諸軍事北徐州刺史此二除也九州之一士風如舊好尚亦同斯境之政始行彼地之人已化仁風和四時之氣德澤霑十日之雨一言出口千里俱應夏秋自馴淮夷清靖陰陽順序非籍景山之行邦國用康弗待休徵之力轉使持節都督秦州諸軍事秦州刺史有陳狷蹶寇我江陰城猶環堵忽被圍逼公班條爲政始隔時序外鄰卽慕其風台境已懷其德

旣而身嬰沈痼大節感人縈帶固於金湯懷夫成於貔豹農
昏相抗交戰必摧淹歷數旬顧有餘力以功賞開府儀同三
司痾恙積時憂勞致損薨於州館春秋五十三遐邇悲傷莫
不掩泣至是號令無主城府淪陷賊徒荷平生之意黎獻
宿昔之恩各盡誠節奉送神柩某月日殯於故里之第贈
持節都督瀛滄安三州諸軍事瀛州刺史尙書令將軍如故
加等之命以王事也除其子玄卿爲膳部郎延嗣之賞義從
古昔年月葬於茲所惟公氣調清遠神彩明暢至察而能容
物機事不傷於道鄙仲舉之少通輕奉高之易挹生知在文
籍之外大學疏識悟之高昆季扶疏閨門禮讓各垂孝悌之
舉俱稱才幹之美自在朝行任兼內外竭誠陳力利物濟時

知幾若神應變如響至仁資執義之武深謀有不疑之斷上
立冥昧晚遇寇讎若增算假年中其智略豈徒非朝夕
清藩部故當吳越平蕩翹足可期忽逢殄瘁之哀更長江湖
之惡人事不幸一至於斯天地不仁何其甚也故吏某官姓
名等日月逾往懷感彌至思騰聲實永永無窮勒石神道紀
功旌伐其銘粵

荀該四海袁號五公高門盛業時異人同愷悌君子降德玄
穹行爲準的孝極始終秩宗官次文昌禁宮移風易俗人代
天工京邑俟政江徼遐通入敷善績出建奇功宰朝霸府恆
擅芳風瑣門雲閣任寄愈隆國之大事其一者戎器械城雉
劬勞在躬附蟬高潔佩綬青蔥畫州分宰仁明有融人知恥

格時皆發蒙陳人違信望我關弓沈疴激憤蘊義成雄或拒
或戰凶徒屢窮嗟乎命也逝水其東圖南落翮謁北歸豐師
霑泣雨城入妖虹豺狼得志藩邑俱空生排寥廓死困樊籠
伊昔邊守贈藥還童蠻夷感德禮敬斯崇故鄉送返無待交
夢哀榮旣畢卉木方叢徒傷人吏追慕充充

洛州都督竇軌碑銘一首

并序

李百藥

蓋聞補天立極大聖於是勃興政亂朝昏民臣以之陳力步
驟之跡旣弘經綸之會斯在固雷風通響成其化者立功紹
濩錯音應其時耆人傑公諱軌字士則扶風平陵受終若帝
之初大放鴻業中興復禹之績因生命氏廣國迫讓之風聲
高外戚安豐功烈之美義正中台爰暨皇唐始於盛漢門感

靈貺母儀天下是故昭章圖牒冠冕指紳經文緯武之才照
重光於百代撞鍾列鼎之盛流餘慶於千祀十二葉祖統雁
門太守大將軍武之從子也武以大功不遂爲閹官所誅統
避難亡奔出塞代爲南部大人威振華夏七葉祖羽魏太尉
遼東京公屬魏氏中微總攝朝政竭忠貞以安社稷挾幼主
而令姦雄曾祖略征北大將軍太保雍州牧柱國建昌孝公
德高禮縟鬱爲帝師清徽素範坐鎮雅俗祖熾魏侍中周大
宗伯隨太傅雍州牧上柱國鄧恭公以蓋俗之姿運如神之
智道尊三代義盡一心父某周太宗伯襄州亳州總管上柱
國鄧國公挺將相之門懷棟梁之器位因功顯名以實高公
藉繁祉之資稟英靈之祚感白雲而諧庶績受璜玉而秘兵

鈴幼樹風神夙標名節志尙宏遠獨秀人倫期管樂於老成
望韓彭於兒戲軼雲羅於沮澤追電駕於當途隨仁壽中以
獻皇旨挽卽授朝請郎遷資陽郡東曹掾苞湘納漢始涓澮
於濫觴蔽日干霄尙峙傾於覆瓿氣憤風雲之際情察天人
之理石立之祥斯兆土崩之義有徵公家卽塗山姻連渭涇
想白狐之慶義屬過門望黃鳥之旗預欣同德及星屯泰并
電奄商郊軍次蒲城便杖劍請謁太上皇見公大悅言及平
生備獻誠款雖盧縮之出入臥內鄧禹之止宿禁中不能過
也命公爲渭南道大使招撫得以便宜從事取永豐之粟甚
漢卒之食敖倉下華陰諸縣同周師之據廣武既有宿飽之
資仍成搃喉之業以功授金紫光祿大夫封贊皇縣公又占

募英勇五萬餘人從入京師翊成大業揚州精甲未足擬議
薊市邪掄曾何等級及兵臨九地氣竭百樓以公爲東面大
將於時四夷雲合萬里風行彭濮比肩樊灌接踵皆出公麾
下止預偏裨任寄之重罕有其二平城之日功實先登進授
光祿大夫卽上柱國也仍除大丞相府諮議參軍事軍諮祭
酒此卽其人霸府洞開首膺高選尋而稽胡侵軼將徧近畿
公乃推轂專征大破凶黨復令公乘勝長驅討薛舉殘猾武
德元年拜太子詹事總司之要任切宮端才地之華允茲時
望尋遷使持節總管隴右諸軍事秦州刺史帶秦州道行軍
元帥秦隴形勝控馭遐遠雖地接京畿而人多異類西戎卽
序之地尙餘榛梗北狄背義之徒時警烽候總以司牧寄之

分閫事兼文武惟公是屬於是翦寇虐以威刑整風俗以平
典寬猛相濟化成朞月某年進封鄮國公食邑通前三千戶
二年以邛僉初平命公持節巡省以爲隴蜀道安撫大使三
年拜益州道行臺尙書左僕射擬跡文昌儀刑端右此之寧
也特異常倫仍以行臺兵從平伊洛然神旗所指事切寒竄
芻牧之勞尙資心力公處帷幄之內在行陣之間運籌執銳
功冠諸部四年平王充擒竇建德仍陪旌節獻捷京師凱樂
之辰五將同列元帥居首是惟聖上榮寵之盛今古未聞七
年廢行臺省仍權檢校益州大都督九年朝廷大論義旗已
來有大功於王室者並食眞邑公於是別賜益州封戶書社
六百家貞觀初拜使持節大都督益綿嘉邛陵雅簡眉八州

嵩南會寧三都諸軍事益州刺史公自杖節華陽綿歷時序
懷荒撫眾之勤定筭存邛之效固以夜郎款徼毘彌率俾非
假諭蜀之文寧勞度瀘之役俘馘之眾每獻朝廷寶賦之多
充仞王府殉公益國不可勝言自秦昭平蜀歷茲永久或班
條刺舉或剖符共化竊比明德彼用多慙王褒樂職之篇蓋
爲小技王尊叱馭之舉非曰大忠文翁之修學校纔方進誘
李冰之斃江神多慙義烈自餘眇小夫何足言尋入爲右衛
大將軍加左光祿大夫文昌上將列位天庭軒禁鉤陳擬儀
震象惟公居之隱如敵國二年拜使持節行都督洛鄭伊懷
四州諸軍事洛州刺史左光祿大夫如故陰陽交會之所山
川作固之都先王以之卜食今上於焉分陝居此地也寶簡

帝心公道在公平義惟正直開物闡化急病讓夷訓五方繁
雜之毗化三川機巧之俗源清流潔風行草偃四年以疾薨
於館舍春秋若干五年葬於某所謚曰某公禮也惟公始於
立身終於行道操履端肅志尙清明未爲顯晦易情不以風
霜變節神用成九德之基天經爲百行之本早升庠序徧觀
流略旣韞從橫之志便輕俎豆之容數爲梁甫之吟每動崇
正之嘯王濬閭巷軒蓋有期陳蕃虛室閒居未掃觀象察變
窮數知來嘗觀赤伏之符且識黃神之命歷唐郊授手大濟
生靈匪止姻連帝家固以才膺王佐潛德之友本以雞酒相
期利見之辰還成魚水相得言行計用未藉三略之書戰勝
攻取自有萬夫之敵故能動合神心畢符冥契牧鯨鯢若摧

朽拉犀象加拾遺擁節臨藩捍城之道斯極分麾鞠旅方面
之績居多功若止山屢形中旨心如金石且降王言而臨軍
用兵莅官行政以爲不言之教藉震曜以爲威大道旣乖非
仁慈之可化純以儒術漢帝謂之亂家先以刑書鄭相以之
理國中興之道云盛遺愛之德猶存是以奉之以律令申之
以檟楚侯嚴霜而厲威則飄風以疾惡至於舊交密戚彌行
直道雖苟晞之烈對從母蘇章之暫禮故人無以喻也亦由
至察共簡易相背強斷與陷直相成故醜正之徒或傳謗
盜憎之訟時聞旒屢爰自貞觀俗易時移太平之化伊始刑
措之風愈洽公望表知裏在變能通協聖主之心遵上皇之
始導德齊禮有恥且格自非惟幾以成務其能與於是乎其

訥慎守道厲精勤事求之古人未易遇也固以重南容之三
復惜陶侃之分陰及遘疾彌留至於大漸每發中使屢遣太
醫凶問至京廢朝軫悼詔葬之儀以極賙贈之制有加夫立
德計功垂範貽則可以銘太常而書王府鏤金石而被管絃
在當年而無嫌歷永代而不朽者惟公平故吏某官姓名等
想生氣其猶存痛徽音之永謝式昭盛業樹碑神道嗣子某
等克搆丕基早標令譽怵惕霜露欲報之志無從匍匐几筵
誅德之情斯切銜哀見託乃述銘曰

炎光浸隱命歷斯窮滔天塞霧振海飛風皇靈膺錄大濟神
功龍興晉野電照秦中灼灼英武人之先覺才應時須神生
靈岳始離纒縲將遊賢學已寤深沈俄觀卓犖乘機去亂杖

義來蘇琯戈振旅玉帳陳謨將屠豚鹿且塞飛狐情深憲鄧
慶叶微盧既入商郊仍開軹道高邑攀鱗靈壇薦寶每奉王
命遞行天討拾益如遣偃秦猶草水關王城神開伊闕策預
玄女功參黃鉞告廟飲至循牆稱伐一廁等夷芬芳無厭河
洛帝里岷峨襟帶畢綜樞機常司要害始遇天造終逢時泰
閒以韋弦動攝羣會南山獻壽北里呈祥將陪東狩遽落西
光羣物不殀彼獨殲良哀纏土庶痛結旻蒼冥漠人理生平
華屋初笑後號始歌終哭烏弈鍾鼎歲蕤簡牘方託辰精徒
嗟梁木

荊州都督劉瞻碑銘一首

并序

李百樂

昔西都佐命罕聞風烈之餘東漢功臣鮮預公卿之任以帝

王之冑隨騰嘯之舉出居侯伯之重入處丹青之地樹鴻勳
於草昧敷文教於彝倫見於武陵劉公者矣公諱瞻字道洽
彭城綏輿里人也今僑居亳州之鹿邑縣自彤雲啟命光宅
域中繁衍之祚無窮克昌之道斯盛固以分華若木疏派咸
池參辰極以高驥振江河以長邁曾祖方譽魏長社縣令祖
英信潁川太守譬仲弓之弘道下邑慶屬後昆卽細侯之布
政近畿福流京縣父玄叔州主簿得性一止忘懷三徑始遊
塵俗終逸江海公藉慶承寵含和稟秀長虹吐潤奔電增暉
靈府之中高懸明月恣儀之表近照澄流爰自幼年遠標風
尚始遊黌塾聞戒露於九皋將騁康衢躡遺風於千里言從
賓貢利用王庭雖禮秩未弘而聲猷藉甚自永州行佐徵授

雍州萬年縣丞隨大業之末頻攝行華陰鄭涇陽鰲屋三原
武功諸縣事是時賦重役煩政荒人散歷試諸縣蓋有由焉
考績獨高優陟宜遠敕除太原縣長神惟改步天將悔禍獨
夫之怨既深撫我之情逾切公仰觀垂象俯慨橫流哀時命
之未申痛人靈之孔棘方成縱壑之資自感登山之夢盡變
通之術進從橫之圖運韜略於樞機煽風雲於懷抱義旗初
建授正議大夫太上皇開大將軍府以公爲諮議參軍事斯
固公達處軍諮之地奉孝成大業之辰豈止孫盛賀循從容
府朝而已聖上別總輶輅出定西河令公權攝行軍長史西
河平進授銀青光祿大夫仍留公檢校西河郡通守得以便
宜從事仍令催督軍糧招集士馬吳起作守未固河山干木

遺風猶多節概公導之以期運示之以幾微於是投袂爭先
贏糧景從非期而會不下萬人武德元年以西河爲涪州授
公刺史九月進位大將軍封武陵郡開國公食邑二千戶西
河始屬亂離人情未一自公安撫咸悅來蘇妖賊劉武周閭
左叛徒挺禍汾晉雖謳歌有奉而窮奇未革同惡相濟醜類
實繁連結百城從橫千里驅率犬羊盡銳攻逼重以并州失
守人情惶懼雲梯地道氣盡百樓烹妾易子糧無半菽公懷
此精誠厲斯忠義非唯舉刃指虜重圍洞開足使拔劍揮泉
飛流自湧士感恩惠以死爲期或刎頸自明或焚妻取信諸
將敗衄多見奔投因公獲濟則有人矣孤城絕援綿歷三年
內安外拒心力俱竭聖上掃清雲祲方得保全進位上柱國

仍除太府卿以旌功伐也公貞固以濟時清明以膺務理繁而不素處劇而行簡氣序纔移大標聲譽五年拜襄州道行臺兵部尙書仍持節山南道巡撫大使戎事之大分職文昌旌節所履載光原隰又以本官檢校襄州都督襄州刺史尋除司農卿帝命四子敬授人時農曰八政實惟國本選眾而舉能官攸屬倉廩旣實禮教斯弘八年以趙王爲安州大都督又以本官檢校安州大都督府長史又權檢校荊州大都督府長史其年又檢校襄州都督貞觀二年又檢校荊州都督五年詔除使持節都督荆峽岳朗澧東松六州諸軍事荊州刺史周稱九命作伯漢云六條刺舉分職設官輕重或異導禮齊德損益同歸昔杜元凱以經國宏才總司南服爰自

樊漢遷督荆郢以今望古比跡爲鄰其撫有蠻夷弘宣王化
豈擇沮漳之令典將盡周邵之遺風焉而黃亮之道未申天
壽之期俄畢促生靈於厚夕掩昭代於重泉以年月日薨於
府舍春秋若干粵以其年月日葬於某所謚曰某公禮也惟
公風力宏遠英姿秀發少多大志卓犖不羣圖鶴列於撫塵
肆龍吟於狹室陳平閭巷車馬每遊王濬門庭旛旗斯在時
有未遇道或可懷屈壯志於膠序挫雄心於俎豆俯仰之節
自合威儀造次之間動成規矩文籍滿腹曾無蹉駁之譏珪
璋潤色寧有多藏之患以義利人以仁求己貴不易交貧而
好施顧惟百行深懼四知廉足激貪儉多逾禮霜霰凝而莫
改風雨晦而不息始見漸陸之姿俄縱垂天之羽附日月而

起沛庭履立黃而翦商邑霸朝諷諫豈止中涓之勤河西守
禦寧唯翼城之固再登九列任隆望重高缺農政爰司王府
叶贊九功兼資億庾惟彼荆衡作固作鎮形勝所屬道風逾
峻江漢澄清琨瑤比閨黃閣未歇丹雘貽豐痛矣國楨傷哉
梁木捐耒釋耜塗吟巷哭鄢郢故墟江山極目清暉素範蘭
芬桂馥藩牧寮采友執通賢共懷遺愛同嗟小年至情枯柏
大署開阡豐碑永樹盛德方傳

夔州都督黃君漢碑銘一首

并序

李百藥

蓋聞龍騰鳳舉聖人德合上天附翼攀鱗名臣道符興運然
濟人活國非止獨見之明保大定功必藉羣才之力大唐乘
乾御歷奄宅區夏圖錄草昧之辰旌旗卷舒之際風雲所感

文武兼資得孫吳之秘策爲韓彭之稱首其唯都督虢國公
者焉公諱君漢字景雲東郡胙城人也皋陶伯益邁種之德
無窮太尉司徒重光之慶稱遠自晉宅淮海代仕丹楊六葉
祖璠與王玄謨同趣滑臺仍爲東郡太守故自江夏徙焉長
江上膺井絡總百谷而會萬川靈河氣積咸池孕驪珠而開
龍運故能含英發秀載挺異人烏弈三古昭章百代曾祖顯
魏散騎侍郎平昌郡太守金珥之華實符令望銀章之重式
允具瞻祖崇太中大夫器守深邃風調高簡中庸履道上宰
待問父制卷懷止壑養志琴書屬天將弃齊政荒人散蛇豕
薦食彭徐危殆君投袂發憤情深批患乃占募鄉人表情式
遇救投鄉豪大都督及本朝傾覆仍從偃仰旣而尉迴稱兵

保全州國仍總督士馬出赴沛州公義承庭訓慶藉緒餘持
名教以立身錯黼藻而成性年甫弱冠耿介不羣指黃閣以
載懷望青雲而孤竦豹略龍韜之旨因心以悟背山面水之
術畫地成圖蹈義之方屬熊掌而不厭趨角之力顧龍文而
以輕七手截蛟忘歸飲羽斃江神而憤壯氣貫月魄而運冥
功隋煬帝驅役中夏遠征遼泚鄉閭首望咸遣募人公義不
獲已傴僂從事雖師徒覆敗猶以先登獲賞授立信尉本州
敕置軍府選補越騎校尉仍爲本府司馬旣而大業數窮朝
危國蹙公深歎橫流方期義舉招輯忠勇且觀時變李密據
茲勝地振彼洪飈力拔嵩華志傾龜鼎公言思禍始擁眾策
名授公上柱國河內總管封汾陰公仍令據守柏崖委以并

吞河朔然同軌之謀已留東并翦商之眾且定西秦公察變
知來雖懷先覺感恩戀舊未忍推亡及魏公喪律方效誠款
竇融之河右言歸劉琮之荊州內向邦之尙焉詔除上柱國
使持節總管懷州諸軍事懷州刺史封東郡開國公食邑三
千戶竇建德鴟張河朔王充狼戾伊瀆絕地爲妖滔天肆虐
柏崖山河表裏密邇寇讎跨太行之險撫崇邱之背是以不
移舊鎮用逼凶醜賊徒嫁禍指期吞噬始則甘言厚幣以怪
亂神終乃窮兵黷武若卵投石以同心同德之眾藉百戰百
勝之威僞將每擒連城必下雲飛銅爵電照金墉辯亡國必
敗之徵奪凶魁將死之魄以功拜使持節總管懷陟恭西濟
四州諸軍事懷州刺史封虢國公食邑三千戶公自獻款聖

朝未蒙利見心馳象魏表請來庭太上皇以氛祲未靖方資
經略間不容髮用惜分陰乃降璽書未允情願仍謂羣臣云
號公誠績昭著朕思見其人宜遣畫工圖厥容象昔鄧禹雲
臺霍光麟閣身歿之後方節丹青豈比皇德念功意存容質
遂以生年用章儀範眇尋前載罕見其倫足以高邁前修傳
芳來葉皇上親馭一戎將傾九地敕公總斯驍銳扈從神麾
於是靖洛闕而受圖書暨河朔而弘聲教飲至廟庭大弘勳
典賞延於嗣禮秩斯隆旣而東魯妖氛塵飛崇岱北趙餘孽
氣積旄頭陪從戎旃言誅後服爪牙之用情寄斯重首虜之
多功無與貳江湖潛沸楊越作梗別總師律以振皇威盡巢
穴致前茅之功自淮肥成破竹之效軍還除使持節都督潞

澤蓋韓遼五州諸軍事潞州刺史唐晉之郊用周禮舊俗韓
趙之際舊戰國餘風喪亂之後人凋俗弊冠冕同裂文章咸
蕩公以□□□厥心靈以墳典開其耳目奉聖皇之訓比屋
可封感邦后之明有教無類及黠虜內侵邊燧夜警暉鼎飛
則神器無守網漏而羣凶競逐人靈之貴涉血履腸地載之
厚爪分鬻切大君有作寧濟區夏七十二戰□于戈二十八
將咸膺星象公望仁義而歸往隨謳歌以欣戴運此謀猷奮
斯靈武義兼追楚之騎實與戡黎之功或任切中權或寄深
麾下或侍言擗俎或式清宮禁雖立女秘術必薦鯨鯢赤伏
神符自奔犀象而皇情乃眷策府書勳懋德懋功可久可大
軼止山而慶賞盡帶礪於無窮乃出總兵機外撫方鎮旣弘

車服之錫還資侯伯之重行太平之化撫思乂之毗鳥獸於是歸仁蠻夷以之革面荒徼之外種落實繁不識君臣莫知正朔公申以文德示以堯心汎海梯山夜郎內款觀風候海朝飛重譯方前驅輦道受記明庭參駕鑾輿告成日觀而彼蒼寡惠與善愆期沈痼彌留晦時愈積眷言神道禍福之塗終昧並走羣望毗史之誠無感粵以貞觀六年薨於州館春秋五十有二城府閔寂風雲悽慘營柳翳以銷亡棠陰蔭而搖落哀纏野祭痛結毗謠庶遺愛之長存恨百身之不贖輒攢夙啟靈舟歸帆攀帷噎水號慕盈塗非關巫峽之猿豈止支江之獸粵以七年十一月還葬於本邑之舊塋皇情軫悼賙贈加等太常考行謚曰某公嗣子騎都尉河壽第二子騎

都尉河上並氣調標舉器幹夙成立德之方終期永錫揚名
之美允屬孝思至性通神叶歸鄉之夢大龜襲吉奉安宅之
圖故吏某官姓名等痛徽猷之永遠懼陵谷之遷貿乃傳芳
金石式昭不朽迺爲銘曰

周氏彭濮漢室吳英並云列土各控強兵竟隨同德並擅高
名於惟上將實總連城和宣義烈翼質休明家積祉社門多
卿相始自江干聿來河上昌平溫雅大夫貞亮曰父之蠱惟
人之望奕載其德我承靈貺眈眈英盼赳赳雄姿唐生問相
太卜開龜示懷廟食獨照軍諮寶銘北虜羿繳東夷遺跡是
慕餘風可追國步屯圯時艱孔棘絕地羣飛經天薄蝕受圖
膺運乘乾立極大濟生靈載清區域震風效響時英肆力將

三
軍挺秀承風扇威縱鱗獨運撫翼橫飛常陪秘策必從戎衣
窮神觀化察變知微山河命賞車服增暉旣戢兵權用人
瘼家肥物阜推厚居薄報德迴龜申寃鳴鶴多見不忍誰云
主詔惟國之楨惟人之鐸循虛警節移望虧輪浮生怛化閱
水歸真高明至此景福誰親泉宮永夕松路非春千年生氣
萬古芳塵

文館詞林四百五十九